

## Rapport annual 2024 Biblioteca populara Disentis/Mustér e contuorn

Igl onn 2024 ha la Biblioteca populara Disentis/Mustér e contuorn festivau siu giubileum da 40 onns. Grazia al susteniment dalla vischnaunca da Mustér sco era allas contribuziuns dallas vischnauncas da Tujetsch, Medel e Sumvitg havein nus astgau offerir gratuitamein alla populaziun ils abonnaments dalla biblioteca durant igl onn da fiasta 2024. Quei ei vegniu apprezziau fetg dallas utilisadras e dils utilisaders e nus astgein selegrar da 55 novs abonnents.

Ultra digl abonnamment gratuit ha il team dalla biblioteca organisau durant gl'entir onn bia differentas occurrenz. Pliras da quellas occurrenz ein sedrizzadas a nossa clientella giuvna: robotica, buorsa per brattar cartas da Pokèmon e da ballapei, zambergiar per Pastgas e Nadal, leger avon al tgaun Tinca, star sur notg en biblioteca, historias a caschun dalla fiera da Nadal, kino da cudischs da maletgs (Mats) sco era historias, versets e canzuns pils pigns (Buchstart).

In'occurrenza tut speciala ei la presentaziun da Sandra Blum per las scolettas stada. Sandra Blum ha visitau nus sco fumitgasa Greta, accumpignada da sia gaglina ha ella raquintau als affons historias e detgas da temps passai.

Ils affons da scola ein stai envidai igl october allas prelecziuns d'auturas e d'auturs. Nus havein astgau beneventar Lena Raubaum per la 1. e 2. classa, Boni Koller per la 3. e 4. classa, Hans Jürgen Feldhaus per la 5. e 6. classa sco era l'autura Grischuna Romana Ganzoni pil scalem superiur. Las interessantas prelecziuns han plaschiu oreifer als affons da scola, allas persunas d'instrucziun sco era allas bibliotecaras.

Pils carschi havein nus organisau il fevrer in'occurrenza cun Felici Schuoler. El ha legiu ord siu cudisch "Pissius: revista d'in muntagnard". El meins fenadur ha Not Soliva presentau sia translaziun "Il Hobbit" da J.R.R. Tolkien. Sco usitau ein quellas duas occurrenz vegnidus cumpletadas cun ina discussiun culs auturs ed in pign aperitiv.

In punct culminont digl onn da giubileum ei stau il brunch ch'il team actual dalla biblioteca (Nadja Hosang, Ulrike Lechmann, Jolanda Venzin, Manuela Venzin e Petra Schmid) ha organisau sonda, ils 23 da mars 2024 per las anteriuras collaboraturas dalla biblioteca. 20 anteriuras collaboraturas sco era enqual commember dalla fundaziun dalla biblioteca han dau suatientscha a nies invit e gudiu da star da cumpignia. Cun cuorts referats havein dau in sguard anavos. Aschia han Jris Lombris-Manetsch e Rico Deflorin, da lezzas uras commembers dall'uniun da giuventetgna, raquintau co els han avon 40 onns dau igl impuls per installar ina biblioteca da scola e vischnaunca. Al president communal d'antruras, Dumeni Columberg, eri reussiu d'organisar las finanzas necessarias ed aschia saviu arver igl october 1984 la biblioteca sut la bitgetta dil scolast Augustin Manetsch cun in team da bibliotecaras fetg motivadas.

In'otra bial'occurrenza ei la viseta dallas persunas d'instrucziun dalla scola da Mustér a caschun digl emprem di digl onn da scola stada. Durant il pushegn han las persunas d'instrucziun giu la caschun da veser inagada puspei la puschida dalla biblioteca e da s'inscuntrar cun las bibliotecaras. Il team da biblioteca ha apprezziau zun fetg quella sentupada, perquei la collaboraziun cun la scola ei fetg impurtonta. Ei gie la promoziun da leger in'incumbensa principala d'ina biblioteca.

Il team dalla biblioteca mira anavos sin in bi ed intensiv onn da giubileum. Nus engraziain cordialmein allas vischnaucas da Mustér, Tujetsch, Medel e Sumvitg pil sustegn duront ils davos 40 onns e sperein che la buna collaboraziun cuntinueschi aunc biars onns.



### **Rapport annual 2024 Biblioteca populara Disentis/Mustér e contuorn**

Im Jahr 2024 feierte die Biblioteca populara Disentis/Mustér ihr 40jähriges Jubiläum. Dank der Unterstützung der Gemeinde Mustér sowie den Beiträgen von Tujetsch, Medel und Sumvitg durften wir zur Feier des Jubiläums alle Bibliotheksabonnemente für die Bevölkerung während des Jahres 2024 gratis abgeben. Dies wurde von den Benutzern sehr geschätzt und wir hatten auch 55 Neueintritte.

Neben dem Gratisabonnement organisierte das Bibliotheksteam während des ganzen Jahres viele verschiedene Anlässe. Viele dieser Anlässe richteten sich an unsere jungen Kunden:

Robotik, Tauschbörsen von Pokémon- und Fussball-Karten, Basteln für Ostern und Weihnachten, Vorlesen vor dem Hund, Übernachten in der Bibliothek, Geschichten während des Weihnachtsmarktes sowie die regelmässig stattfindenden Bilderbuchkino-Anlässe (Mats) und Buchstarts für die Kleinsten.

Ein Anlass der besonderen Art war der Auftritt von Sandra Blum für die scoletta-Gruppen im April. Sandra Blum besuchte uns als Magd Greta mit ihrem Huhn und hat den Kindern Geschichten und Sagen aus vergangenen Zeiten erzählt.

Die Schulkinder waren im Oktober zu den Autorenlesungen eingeladen. Wir durften Lena Raubaum für die 1. und 2. Klasse, Boni Koller für die 3. und 4. Klasse, Hans Jürgen Feldhaus für die 5. und 6. Klasse sowie die Bündner Autorin Romana Ganzoni für die Oberstufe begrüßen. Die spannenden Lesungen kamen sowohl bei Schülern als auch Lehrern und Bibliothekarinnen sehr gut an.

Für die Erwachsenen organisierten wir im Februar einen Anlass mit Felici Schuoler, der aus seinem Buch «Pissians: revista d'in muntagnard» las. Im Juli präsentierte Not Soliva seine Übersetzung «Il Hobbit» von J.R.R. Tolkien. Wie gewohnt, wurden diese zwei Veranstaltungen umrahmt von einer Diskussion mit den Autoren und einem Aperó.

Ein Höhepunkt des Jubiläumsjahres war der Brunch, den das jetzige Bibliotheksteam (Nadja Hosang, Ulrike Lechmann, Jolanda Venzin, Manuela Venzin und Petra Schmid) für die ehemaligen Bibliotheksmitarbeiterinnen am Samstag, den 23. März 2024 organisierte. Es trafen sich 20 ehemalige und aktive Bibliotheksmitarbeiterinnen zum Wiedersehen und Austausch sowie einige Gründungsmitglieder. In kurzen Reden blickte man zurück auf die Anfänge. So erzählten uns Jris Lombris-Manetsch und Rico Deflorin, wie sie als Mitglieder der uniuon da giuventetgna vor 40 Jahren den Anstoss für den Aufbau einer Schul- und Gemeindebibliothek gaben. Dem damaligen Gemeindepräsidenten Dumeni Columberg gelang es, die notwendigen Finanzen zu organisieren und so konnte schliesslich unter der Leitung des Lehrers Augustin Manetsch und einem Team hochmotivierter Bibliothekarinnen im Oktober 1984 die Bibliothek eröffnet werden.

Ein anderer schöner Anlass war der Besuch der Lehrerinnen und Lehrer von Mustér am ersten Schultag im August. Bei einem Imbiss hatten die Lehrpersonen die Gelegenheit, sich wieder einmal das Angebot der Bibliothek anzuschauen und sich mit den Bibliothekarinnen auszutauschen. Das Bibliotheksteam hat diese Begegnung sehr geschätzt, da die Zusammenarbeit mit der Schule äusserst wichtig ist. Zählt doch die Leseförderung zu den Hauptaufgaben einer Bibliothek.

Das Team der Bibliothek blickt also zurück auf ein sehr intensives und schönes Jubiläumsjahr. Wir bedanken uns herzlich bei den Gemeinden Mustér, Tujetsch, Medel und Sumvitg für die Unterstützung während der letzten 40 Jahre und hoffen, dass sich die gute Zusammenarbeit noch viele Jahre fortsetzt.